



Komunikadu Imprensa

Tribunál Distritál Dili

22 Novembru 2016

Tribunál kondena pena prizaun tinan 12 bá krime abuzu seksuál ba menór ho agravasaun JSMP: sentensa ne'e la-reflete ho prejuízu ne'ebé afeita ba lezada

Tribunál Distritál Dili kondena pena prizaun tinan 12 ba krime abuzu seksuál ba menór ho agravasaun ne'ebé akontese iha Distritu Dili. Tribunál konklui katak arguidu provadu komete krime hasoru lezada ne'ebé sei ho idade tinan 11. Leitura akordaun ne'e halao iha 9 Novembru tinan 2016.

Ministériu Públiku akuza arguidu kontra artigu 177 kona-ba abuzu seksuál ba menór husi númeru (1) ho argavasaun ba artigu 182 númeru (1) ho letra (a) husi Kódigu Penál.

“Sentensa ne'ebé aplika ba arguidu la reflète prejuizu ne'ebé afeita ba lezada, tanba Tribunál la konsidera profundamente sirkunstánsia sira ne'ebé bele sai hanesan fatores agravantes hosi kazu ne'e atu hatodan nia kastigu,” dehan Luis de Oliveira Sampaio, Diretór Ezekutivu JSMP.

Pena másimu hosi artigu 177 (1) no artigu 182 (1) letra (a) mak tinan 26 fulan 8 iha prizaun. Tanba ne'e pena ne'ebé aplika ba arguidu la reflète sirkunstánsia no gravidade hosi krime ne'e, no Tribunál falla atu asegura justisa ne'ebé adekuada no justu ba lezada.

Tribunál prova katak iha 09 Feveireiru 2016, arguidu kaer lezada nia liman no dada lezada ba baraka laran (uma oan iha tasi-ibun), kesi tiha lezada nia liman, no hatoba lezada ba hadak leten, hasai lezada nia rounpa too ain-tuur atu halo relasaun seksuál ho lezada. Maibé arguidu la konsege tanba lezada tebe hasoru arguidu too monu ba rai. Depoisode ne'e, lezada hader no halai, maibé arguidu hakilar tuir no ameasa lezada atu labele dehan ba ema seluk, selae arguidu sei oho lezada.

Tribunál mós prova katak arguidu ho lezada hela hamutuk iha uma ida, no arguidu komete hahalok ne'e dala rua ona hasoru lezada iha 27 Dezembru 2015. Arguidu rasik konfesa katak iha 06 Feveireiru 2016 arguidu halo relasaun seksuál ho lezada no iha momentu ne'ebé lezada sei iha idade tinan 11.

Tuir loloos Tribunál tenke halo alterasaun atu bele inklui nu'udar konkursu ba krime, tanba arguidu nia hahalok ne'e prienxe krime konkursu tanba arguidu halo relasaun seksuál dala tolu hasoru lezada.

Arguidu nia estatutu nu'udar kaben-nain, iha feen ho oan no hatudu ona nia arependimentu ba ninia hahalok la-relevante ba krime ne'ebé hasoru menór no liu-liu tanba krime ne'ebé arguidu komete ne'e fila-fila ona hasoru lezada ne'ebé sei menór.

Tuir JSMP, pena ne'e la ekilíbriu ho lezada nia sofrimentu tanba la akomoda agravasaun kona-ba arguidu abuzu nia autóridade iha familiar no tanba nu'udar krime konkursu. Iha Tribunál nia avaliasaun sirkunstánsia sira relasiona ho krime ne'e, Tribunál konsidera katak arguidu nia hahalok ne'e kauza no prejudika dezvoltamentu lezada ne'ebé sei menór, maibé Tribunál falla atu asegura pena adekua no indemnizasaun ruma ba arguidu atu kumpri.

Iha Artigu 34 Konvensaun Direitu Labarik (KDL) rekere katak “Estadu Parte sira tenke foti medida atu fó protesau ba labarik sira hasoru forma hotu-hotu esplorasau seksuál no abuzu seksuál nian. Kona-ba propóziitu ida-ne'e, Estadu Parte sira tenke foti medida nasional, bilaterál no multilaterál apropiada atu liu-liu prevene: a) bosok ka halo koersaun ba labarik ida atu tama iha atividade seksuál ne'ebé ilegál; b) uza labarik atu esplora iha prátika prostituisaun nian ka prátika seksuál seluk ne'ebé ilegál; c) uza labarik atu esplora iha asaun no materiál pornográfiku sira.”

Nune'e mós Artigu 39 KDL define katak Estadu Parte sira tenke foti medida hotu-hotu ne'ebé apropiada atu promove rekupersaun física no psicolójiku no integrasaun sosiál ba labarik sira-ne'ebé sai vítima tanba: forma ruma hosi negligénsia, esplorasau ka abuzu; tortura ka tratamentu ka kastigu ho forma kruél seluk, ne'ebé dezumanu ka hatún dignidade; ka tanba konfliktu armadu. Rekupersaun no reintegrasaun sei hala'o iha ambiente ida-ne'ebé haburas saúde, respeita-an no respeita dignidade labarik nian.

Iha fatin seluk, JSMP mós preokupa no kestiona makaas kona-ba sentensa tinan 12 prizaun ne'ebé Tribunál Distritál Suai hatun ba kazu abuzu seksuál seluk kontra lezada ne'ebé foin mak tinan 4 ne'ebé julga liuhosi Tribunál movel iha Distritu Ainaro. Tribunál konklui katak arguidu GdC provadu komete krime abuzu seksuál hasoru lezada, iha 29 Marsu 2016, Distritu Covalima. Kazu ne'e grave tebetes tanba involve lezada ne'ebé ho idade sei ki'ik loos. Julgamentu ba leitura akordaun ba kazu ne'e hala'o iha 24 Outubru 2016.

JSMP espera katak iha futuru, Tribunál iha kapasidade atu avalia ho adekuada no profundamente ba faktu sira relasionadu ho krime ne'e. Partikularmente atu asegura katak faktu hirak ne'e bele kontribui ba pena ida-ne'ebé adekuada no justu tuir krime nia gravidade no nia prejuízu ba lezada no sofrimentu ne'ebé lezada hasoru. Ida-ne'e nu'udar forma ida katak Estadu liuhosi ninia instituisaun relevante sira hanesan Tribunál hakribi no kondena maka'as kualker forma krime ne'ebé kontra labarik no halo tuir Estadu nia obrigasaun sira tuir lei internasional ne'ebé Estadu ratifika ona.

Kazu ne'e rejistu iha Tribunál ho Nú.Procesu: 0026/16.DBCR, julgamentu ne'e prezide hosi Dra. Albertina Neves (reprezenta juis kolektivu). Enkuantu Ministériu Públiku reprezenta husi Dr.

Nelson de Carvalho no arguidu hetan defeza hosi Dr. João Hendrique de Carvalho hosi Eskritoriu Defensória Pública.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org